



20. august 2021

UKA2021/45

Inatsisartut suleriaasianni § 33 naapertorlugu aalajangiiffigisassatut siunnersuut imaattoq matumuuna Inatsisartunut saqqummiunneqarpoq:

Meeqqat inuusuttuaqqallu angerlarsimaffiup avataanut inissinneqartartut ikilisinniarlugit ilaqtariinnut iluaqtaasumik siusissukkut iliuseqartarnissamik Naalackersuisut pilersaarusoqqullugit peqquneqarnissannik Inatsisartut aalajangiiffigisassaattut siunnersuut. Pilersaarusiaq juli 2022 naatinnagu tamanut saqqummiunneqassaaq.

(Inatsisartunut ilaasortaq Jess Svane, Siumut)

Tungavilersuutit:

“Angajoqqaanni najugaqarusuppunga meerarsiaarusunngilanga!!! Ilaannikkulli ajorneq ajorpoq umiatsiartaratta. Anaananni najugaqarusuttorujussuuvunga!!! Anaanaga asatorujussuugaku”¹.

MIO-p nalunaarusiaasa ilaanni taamatut meeraq oqarsimasoq issuarneqarpoq. Ilaqtariit sapinngisaq tamaat ataatsimoortinniarneqartariaqarput.

Qinikkatut uagut qulakkiissallugu akisussaaffigaarput Naalagaaffiit Peqatigiit Meeqqat pillugit Aalajangersagaata 1993-imi nunatsinniit peqataaffigissallugu atsiorsimasaani meeqqat tamarmik pisariaqartitaannik ikiorneqarnissaat, aamma pisussaaffigaarput meeqqat pillugit aalajangersagaq naapertorlugu nunatsinni inatsisiliussalluta, aammalu tassani aalajangersakkat malinneqarnissaat pisussaaffigalugu.

Ajoraluartumik Meeqqat Oqaaseqartartuata 2015-imiit 2018-imut sulinermini takutippaa nunarput Meeqqat pillugit Aalajangersakkami immikkoortut 20-it² tikillugit nunarput eqquutsitsinngitsaq. Aalajangersagaq 9-mi ilaatigut ilaqtariit ataatsimoortinneqarnissaat sammeneqarpoq, aammalu aalajangersagaq 5-mi angajoqqaat ilitsersorneqarnissaat aammalu meeqqap angajoqqaajusut ilitsersorneqarnerisa ataqinninnissaanut tunngasut sammeneqarlutik.³

Meeqqat soorunami suna tamaat akigalugu angerlarsimaffiminniitinneqarniarsarissanngillat, kisianni pingaaruteqarpoq inuiaqatigiittut angerlarsimaffiup avataanut inissiisarneq aaqqiissutissatuatut isigissanngikkipput. Taamak annertutigisumik iliuseqarnermut taarsiullugu iliussissanik nassaarsinnaasariaqarpugut.

¹ http://mio.gl/wp-content/uploads/2018/11/mio_suliai_15-18_web.pdf

² http://mio.gl/wp-content/uploads/2018/11/2018_11_mio_nuna_tamakk_pilersaa_web2.pdf

³ http://mio.gl/wp-content/uploads/2018/07/2018_06_mio_konvention_lang_web1.pdf



Ullumikkut illoqarfinni amerlanerni ilaqutariinnut ikiuisarfiit Allorfik aamma Alliaq aqutigalugu MANU-mik taallugit angajoqqaanut pikkorissaanerit ingerlanneqartarput, kisianni taakkununga peqataassagaanni ilaqutariittut nukissaqarnissaq angummassinnaanissarlu pisariaqarpoq, aammalu peqataanissamut piunasaqaatinik eqquutsisisimanissaq.

Takorloorpara Naalakkersuisut pilersaarusiatus sulinerminni ilanngullugit eqqarsaatigissagaat angerlarsimaffiup avataanut inissiisarnermi suleriaatsit. Tassunga suliamut ilisimasallit, ilisimatuut sullissisullu peqataatinneqarnissaat pingaarutilerujussuvoq. Taamaattoq meeqqat aamma tusaaneqartariaqarput. Tassami taakku pineqarmata.

Angerlarsimaffiup avataanut inissiineq tamatigut periarfissat kingullersarisariaqarpaat.

Neriuppunga siunnersuutip matuma pingaaruteqassasusia takusinnaassagissi. Oqallilluarisi.

Siunnersuutip aningaasatigut allaffissornikkullu pisortanut kingunerisassai

Pilersaarusionerme A/C-fuldmægtigimik ataatsimik sulisitsinissaq missingersorneqarpoq, 500.000 kr.-inik naleqartumik.

Siunnersuutip aningaasatigut allaffissornikkullu namminersortunut kingunerisassai

Soqanngilaq.

Siunnersuutip aningaasatigut allaffissornikkullu innuttaasunut kingunerisassai

Soqanngilaq.